

Х ө ө ч н р, т а н д!

Эн өдрт Элст балгъсна культуруин Герип художественн самодейательность белдвр кецхäv. Хар газрт бävх хөөчнрт концерт үзүлх өдр ирв. Культуруин Герин өөр агитбригадг орлцджах арви негн күн өрүгъяр цуглрв.

Хөөчнрин түрүн хошд, Элст балгъсна партин комитетд көдлдг үр Марусенко „нарт делкән бävдлин тускар“ лекц умшдж өгв.

Лекторин келсн тоотиг нег үг алдл уга, ухагъан тävдж цуглрсн улс сонъсцхав.

Социалистическ орн-нутгудин коммунистическ болн көдлмшч партьсин элчнрин Москвад болсн Советаньд батлгдсн Декларациг болн Төвкнүн бävлгънä Манифестиг хөөчнр икär сонъмсдж сонъсцхав.

Лекц чилснä дарунь концерт эклв. Түрүн болдж Лагана туск хальмг ду дуулцхав. „Пишет письма подруга матросу“ гидг дун терүг сольв, дарунь „Чичрдг“ гидг хальмг би биилцхäv.

Надбитов Саша Бакинова Лида хойран дуулсн хальмг частушк хөөчнрт дегд сävнär таасгдв. „Барыня“ гидг сергмджтä орс бииг сävнär биилсн Калинин Василиг, хойрдад сурлж биилүлв. Энүнä үзүлсн „На-наиск ноолдан“ эднд бас икär таасгдв. Ревенко Надя украинна келär умшсн хөкрлгъиг, хөөчнр инäдж, шууглддж сонъсцхав.

Зөвär өөдән гарчксн сарин герлд тег мануртдж дүнъгәнä, хөд амрдж кевтцхәнä. Болв хөөнä хошмуд талас сävхн дун-биигъин айсмуд күнъкнäd, альх ташлдснъ сонъсгда бävнä.

Концерт төгсв, хөөчнр ик гидгär эднд ханлтан өргцхäv.

Хар газрт бävх Яшкульск района „Гашунский“ совхоз, Целинн района „Родина“ колхоз, Элст балгъсна Сталинä нертä, Ленинä нертä, „Страна Советов“ болн „Победа“ колхозмудар художественн самодейательностин бригад эврәннъ эрдмән цааранднъ чигн үзүлхмн.

Л. СЕРГЕЕВА.